

南山律在家備覽 略編

學者宜先詳覽卷首之例言及目表然後再閱正文


持犯篇

▲事鈔云「然戒是生死舟航出家宗要。受者法界為量持者麟角猶多良由未曉本詮故得隨塵生染。此既聖賢同有欽序何得抑忍不論故直筆舒之略分四別。一者戒法此即體通出離之道二者戒體即謂出生眾行之本三者戒行謂方便修成順本受體四者戒相即此篇所明通互篇聚」資持釋云「初二句標歎戒功依此淨戒得越苦海故如舟航凡入道門無不稟戒故是宗要。受下明多犯所以受時徧境俱發故通法界隨中一行猶難故如麟角。麟是瑞獸國君有道乃現。止有一角舉此喻其少耳。受多持少患在迷教故云良由等本詮即目律教塵染即是毀犯。此下示意列章上句引聖為況何下顯今須述故下列示章門通出離者貫徹因果故生眾行者基址義故順本受者是隨行故通篇聚者屬教詮故互即徧也。」

通互篇聚者是即以戒本為相就法而辨。文舉篇聚局具戒言若五八戒如濟緣云罪無篇聚至於大重小輕方便趣果義則不別也。

事鈔中標示戒法戒體戒行戒相四種前後文凡兩出其中戒法戒體戒行前後文義大同今並編入宗體篇內唯戒相一種前後有異前約行行後就法辨就法中廣示持犯卷帙繁重故今別立持犯篇具明此義前宗體篇中第四門戒相僅明約行一義耳。

▲資持云「問何者為相答如後釋戒三科束之一所犯境二成犯相三開不犯總為相矣更以義求亦為三別一犯與不犯二犯中有輕重不同三有方便根本差別統論其相不出心境如下更解」



三別、一犯與不犯、二犯中有輕重不同、三有方便根本差別統論其相不出心境如下更解」

▲資持云『問、何以不但釋相而總論四戒者。答、戒是一也、軌凡從聖名法、總攝歸心名體、三業造修名行、覽而可別名相由法成體、因體起行、行必據相、當知相者即是法相、復是體相、又是行相、無別相也。若味餘三、直爾釋相、既無由序、不知所來、徒自尋條、終難究本。』
已上皆見事鈔記卷十五

▲資持云『前明戒法但述功能、次明戒體唯論業性、後明戒行略示攝修。若非辨相、則法體行三一無所曉。何以然耶。法無別法即相是法體、無別體總相為體、行無別行履相成行是故。學者於此一門、深須研考。然相所在、唯指教詮。舉要示相不出列緣、緣雖多少不出心境。罪無自體、必假緣構、非境不起、非心不成。若曉此意、類通一切、皎如指掌。餘更如文。』
見事鈔記卷十七



▲資持云『以總收別、由別顯總、前後相照、持犯方明。』
見事鈔記卷十五

第一門 持犯總義

持犯總義中分為九章

